



KEMENTERIAN WILAYAH PERSEKUTUAN

**TEKS UCAPAN  
YB DATUK SERI UTAMA TENGGU ADNAN BIN TENGGU MANSOR  
MENTERI WILAYAH PERSEKUTUAN**

**SEMPENA  
MAJLIS PELANCARAN KAD CERIA PERINGKAT WP LABUAN**

**3 JUN 2017 (SABTU), 10.00 PAGI  
BATARAS, LABUAN**

---

**BISMILLAHİ RAHMANİR RAHİM**

**Terima Kasih Pengacara Majlis,**

***(Senarai Salutsasi akan diselaraskan kemudian)***

**Assalamualaikum Warahmatullahi Wabarakatuh, Salam Sejahtera dan Salam 1Malaysia.**

1. Alhamdulillah, saya bersyukur ke hadrat Allah Subhanahu wata'ala kerana dengan limpah izinNya dapat kita berkumpul pada hari yang penuh bermakna ini untuk melancarkan Kad Ceria Wilayah Persekutuan 2017.
2. Justeru saya ingin mengucapkan terima kasih serta syabas dan tahniah kepada Ketua Setiausaha dan pegawai-pegawai Kementerian Wilayah Persekutuan serta agensi kerana telah merealisasikan hasrat saya untuk membantu warga Wilayah

Persekutuan dalam menangani beban kos sara hidup yang agak tinggi sejak akhir-akhir ini.

**Tuan-tuan dan Puan-puan yang dihormati sekalian,**

3. Idea asal untuk mengadakan Kad Ceria ini telah tercetus dan telah dilancarkan pada tahun 2015 lagi. Idea ini timbul atas keprihatinan Kerajaan yang sentiasa merasai denyut nadi setiap rakyat yang semakin terbeban dengan kenaikan kos sara hidup terutamanya di ketiga-tiga Wilayah Persekutuan ini. Namun pada masa tersebut hanya satu sahaja rakan dagang yang bersetuju untuk menyertai program ini iaitu **Mydin**.
4. Konsep penggunaan kad pada masa tersebut adalah secara pemberian mata ganjaran dan diskaun. Saya difahamkan keuntungan melalui transaksi penggunaan Kad Ceria berkenaan sejak diperkenalkan adalah sebanyak RM22 Juta. Kita mengucapkan ribuan terima kasih atas kerjasama yang diberikan oleh Mydin.
5. Angka ini amat menggalakkan dan membuktikan ianya diterima oleh warga Wilayah Persekutuan. Ekoran itu, saya rasa terpanggil sekali lagi untuk menambah baik program kad ini yang berkonsepkan **diskaun terus** melalui penglibatan lebih banyak rakan dagang.
6. Saya telah mengarahkan Ketua Setiausaha Kementerian Wilayah Persekutuan dengan dibantu oleh Dewan Bandaraya Kuala Lumpur, Perbadanan Labuan, Perbadanan Putrajaya dan

Perbadanan Pembangunan Kampong Bharu untuk menggiatkan usaha mempercepatkan program ini dengan penglibatan lebih ramai warga Wilayah Persekutuan terutama sekali golongan B40 iaitu golongan berpendapatan sederhana dan rendah.

**Tuan-tuan dan Puan-puan yang dihormati sekalian,**

7. Atas usaha kami memujuk Rakan Dagang sebanyak mungkin, Alhamdulillah Kad Ceria Wilayah Persekutuan 2017 pada kali ini mendapat sambutan Rakan Dagang yang sangat luar biasa kerana sehingga kini sebanyak **1124 syarikat yang melibatkan 1352 cawangan** dari pelbagai bidang telah bersetuju untuk menyertai program kita. **Angka ini turut termasuk 45 rakan dagang di Labuan yang terdiri daripada:**

- i. Empat (4) hotel
- ii. Satu (1) kedai cermin mata
- iii. Sembilan (9) kedai kain dan butik pakaian
- iv. Lapan (8) restoran
- v. Lima (5) kedai telefon
- vi. Satu (1) kedai coklat
- vii. Tiga (3) kedai serbaneka
- viii. Empat (4) butik kecantikan dan butik pengantin
- ix. Tiga (3) hypermarket dan superstore
- x. Satu (1) kedai jahit
- xi. Satu (1) sekolah
- xii. Lima (5) lain-lain

8. Kita boleh berbangga bilamana kepelbagaian premis perniagaan ini mencakupi pelbagai kategori daripada kedai barangan makanan harian, kedai-kedai makan, klinik perubatan, hotel, pusat tuisyen, pusat jagaan kanak-kanak, kedai buku, sehinggalah kedai alat komunikasi dan lain-lain turut menyertai program ini. Premis perniagaan ini terdapat di semua 13 parlimen di Kuala Lumpur, Putrajaya dan Labuan. Fungsi dan penggunaan kad ini akan sentiasa ditambahbaik dari semasa ke semasa serta penyertaan rakan dagang juga akan ditambah bilangannya dari semasa ke semasa.
9. Selain itu, pihak Perbadanan Labuan turut menawarkan insentif kepada rakan dagang (*merchant*) iaitu diskaun 50% memperbaharui Lesen Premis Perniagaan dan diskaun 50% memperbaharui Lesen Penjaja.
10. Faedah-faedah lain yang bakal diperolehi Pemegang Kad Ceria adalah diskaun daripada rakan dagang antara 5% hingga 30% dan diskaun sebanyak 50% penyewaan di fasiliti milik Perbadanan Labuan.

**Tuan-tuan dan Puan-puan yang dihormati sekalian,**

11. Kad Ceria WP 2017 telah mula diedarkan di kesemua 13 Parlimen termasuk Parlimen Labuan. Sebanyak **25,482 Kad Ceria** telah siap dicetak dan telah diterbangkan ke Pusat Khidmat Masyarakat Labuan untuk pengedaran. Pengedaran kad ceria akan dibuat beserta dengan **booklet** yang mengandungi senarai rakan dagang yang telah bersetuju untuk menyertai bagi memudahkan pengguna

untuk mendapatkan maklumat senarai rakan dagang yang menyertai program ini. Senarai rakan dagang ini akan sentiasa dikemaskini dari semasa ke semasa melalui portal <https://kadceria.kwp.gov.my>. Tuan-tuan dan puan-puan boleh melayari laman sesawang tersebut untuk melihat senarai terkini rakan dagang yang menyertai program kad ceria ini.

12. Kad ini akan diberikan secara percuma kepada pengguna yang memohon dan keistimewaan kad ini ialah tiada tarikh tamat tempoh penggunaan kad.
13. Selain itu, Kementerian Wilayah Persekutuan juga mempunyai satu aplikasi yang dinamakan **1WPrice**. Aplikasi ini akan menunjukkan kepada pengguna tentang premis-premis perniagaan yang menawarkan harga berpatutan atau rendah. Aplikasi sedang dinaiktaraf buat masa sekarang dan akan sedia untuk digunakan pada bulan Oktober 2017. Melalui aplikasi ini, semua rakan dagang akan diberikan akses untuk membuat promosi mengenai premis perniagaan masing-masing. Di samping itu, tuan-tuan dan puan-puan juga dapat melihat promosi-promosi menarik dan berkongsi maklumat mengenai premis-premis yang menawarkan harga terendah.

**Tuan-tuan dan Puan-puan yang dihormati sekalian,**

14. Saya berharap dengan adanya Kad Ceria ini, dapat membantu serba sedikit mengurangkan beban warga Wilayah Persekutuan menguruskan perbelanjaan harian mahupun kos sara hidup tinggi masing-masing terutamanya dalam keadaan ekonomi dunia yang

sangat merudum pada ketika ini. Adalah besar harapan saya supaya semua warga Wilayah Persekutuan dapat menikmati kehidupan yang lebih ceria dan sejahtera selaras dengan slogan Wilayah Ceria Rakyat Sejahtera.

15. Saya sedar program seperti ini tidak akan berjaya dilaksanakan tanpa mendapat kerjasama dan komitmen daripada rakan dagang dan pengguna sekalian.
16. Oleh itu, saya berharap agar tuan-tuan dan puan-puan sentiasa menyokong segala usaha dan inisiatif yang dilaksanakan oleh Kerajaan dalam membantu warga Wilayah Persekutuan khususnya untuk menangani bebanan kos sara hidup yang tinggi.
17. **Akhir kata, saya dengan lafaz Bismillahirrahmanirrahim, dengan ini merasmikan Majlis Pelancaran Kad Ceria di Wilayah Persekutuan Labuan.**
18. Sekian, Wabillahitaufik Walhidayah, Wassalamualaikum Warahmatullahi Wabarakatuh. Terima kasih.